



Inatsisartuni ilaasortaq Jens B. Frederiksen, Demokraatit  
c/o Inatsisartut Allattoqarfiat  
3900 Nuuk

**§ 37 naapertorlugu 2014-imi apeqqummut nr. 023-mut akissut**

03-02-2014  
Sags nr. 2014-095482  
Dok. nr. 1473179

Ulloq 23. januar 2014 imatut Naalakkersuisunut apeqquteqarsimavutit:

1. Suna pissutaava § 37 naapertorlugu apeqqutima nr. 121-p akiniarnera ukiup affaanik sivilissuseqarsimammat naak teknikkikkut pisariunngilluinnaraluartut? Piumasaraara torersumik eqqortumillu akineqarnissara asuli teknikkimut tunngasunik utoqqatsissutissarsiorasi soorlu oqarlusi allakkap suliarinera kukkusumik pisimasoq.

Postboks 1015  
3900 Nuuk  
Tlf. (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

2. Suna pissutaava § 37 naapertorlugu apeqqutima nr. 184-p akiniarnera ukiup affaanik sivilissuseqarsimammat naak teknikkikkut pisariunngilluinnaraluartut? Piumasaraara torersumik eqqortumillu akineqarnissara asuli teknikkimut tunngasunik utoqqatsissutissarsiorasi soorlu oqarlusi allakkap suliarinera kukkusumik pisimasoq.

3. Naalakkersuisut ataani atsiortunga isumaqatiginerlunga oqarama apeqqutima 121-p 184-illu akiniarnerisa sivilisnerat kanngunarluinnartoq aamma tamanna pillugu Naalakkersuisut sivilisuumik akissuteqannginnertik pillugu ataqqinninngitsumik ilionertik pisortatigoortumik Inatsisartunut utoqqatserniarpat/ajuusaarnertik apuunniarpat?

4. Paasivara Naalakkersuisut allattut, allagaatinut takunnikkumallunga qinnuteqaatiga apeqqutinnut normu 184-mut ilaasumut akissut piaartumik tigujumaariga Naalakkersuisut suliniutit suut aallartinniarpaa qulakkeerniarlugu, innuttaasut allat uattulli arriitsigisumik unioqqutitsisumillu sullinneqannginnissaat?

(Inatsisartunut ilaasortaq Jens B. Frederiksen, Demokraatit)

Tunngavilersuut:

Inatsisartut Naalakkersuisullu suleqatigiinnerat paatsuugassaangilaq. Inatsisartut Naalakkersuisunut sulisitsisuupput. Tassa ilaatigut imaappoq Naalakkersuisut pisussaapput Inatsisartuni ilaasortat pisortatigoortumik apeqqutaannut akissuteqassalutik. Apeqquteqartoqarsinnaavoq ilaatigut Inatsisartut Suleriaasianni § 37 naapertorlugu.

18. juli 2013 – ukiup affaa matuma siorna sinnilaarlugu – ajornanngitsuaqqanik pingasunik Naalackersuisunut apeqquteqarpunga. Apeqqutit taakku 121-mik normoqartut aatsaat akineqarput.

Aamma taamatorpiaq pisoqarpoq apeqqutinnut 184-mut tunngatillugu. Apeqqummut tassunga akissutit aatsaat qaammatit sisamat ingerlareersut akineqarput.

Paasisinnaanngilluinaqqissaarpara qanoq ilillutik Naalackersuisut piffissaq taama sivilutigisoq atorsinnaaneraat apeqqutit ajornanngitsuaqqat akinissaannut taamaattumik piumasarivara eqqortumik akineqaqqullunga suna pissutaanersoq taama paamaarussinermut.

Qulaaniittumi apeqqummi takuneqarsinnaasutut kissaatiginngilara akineqarnissara, siviluallaamik akiniarnermut pissutaasoq "kukkusumik allakkap suliarineqarsimanera".

Apeqqut normu 184 eqqarsaatigalugu, apeqqutima taasuma iluaniippoq allagaatinut takunnikkumallunga qinnuteqaatiga. Piumasaqaatit taamaattut Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni nr. 9-mi, 13. juni 1994-imeersumi § 16 imm. 2 naapertorlugu – akuerineqartussaapput itigartinneqarlutilluunniit ullut qulit iluanni. Maannakkut ullut 120-t ingerlareerput sulilu utaqqivunga.

Eqqarsaatigaara taamatut akuerineqarsinnaanngitsumik utaqqisitaanera Inatsisartut ombudsmandianut naammagittaalliutiginiarlugu.

Apeqqutit tiguneraniit ullut suliffiit nalinginnaasut qulit iluanni akeqquneqarput. Misilittakkallu tunngavigalugit taanna uteqqippara naqinnerit angisuut pualasuullu atorlugit.

#### **APEQQUTIT TIGUNERANIIT ULLUT SULIFFIIT NALINGINNAASUT QULIT ILUANNI AKEQQUNEQARPUT.**

---

Apeqqut 1, 2 aamma 3: Naalackersuisut Siulittaasuata Naalackersuisoqarfiata § 37 naapertorlugu apeqqutivit Inatsiseqarnermut Immikkoortortaqarfimmit, piffissami siviluumi pisortaqaarsimanngitsumit sulisumillu ataasiinnarmik suliassanik suliarinnittartumik ataasiinnarmik sulilerlaamik inuttaqaarsimasup, akineqarnissaat nalilersorsimavai. Naak Naalackersuisut Siulittaasuata Naalackersuisoqarfiata Inatsisartut Siulittaasoqarfia ulloq 18. december 2013-imi ilisimatikkaluaraa, apeqqutivit akineqarnissaat Inatsiseqarnermut Immikkoortortaqarfimmi sulisut ikinnerat pissutigalugu aatsaat ulloq 20. januar 2014 nallertinnagu akineqarnissaat naatsorsuutigineqarsinnaasoq, tamatuma akinissamut piffissap sivilusimanera allannortinngilaa, tamannalu ajuusaarutigaa.

Maanna nutaamik inatsiseqarnermut pisortamik atorfinittoqarsimalerpoq  
Inatsiseqarnermullu Immikkoortortaqarfimmi sulisut amerlinissaat 1. marts 2014  
piviusunngussaaq. Taamaattumik piffissap sivisuup apeqquvitit suliarineqarnerannut  
atorneqartup maanna oqaluttuaannanngornissaa naatsorsuutigaara.

Apeqqu 4: Suliamut aalajangersimasumut § 37 naapertorlugu Naalakkersuisunut  
apeqquteqarnermut atatillugu allagaatinik takunnikkumaneq nalinginnaasuunngilaq.  
Taamaattumik allagaatinik takunnikkumanermik noqqaassuteqarneq  
takkuitsorneqarsimavoq taamaattumillu sukkasuumik akineqarnissaa  
qulakkeerneqarsimanani.

Inussiarnersumik inuulluaqqusillunga



Aleqa Hammond

Naalakkersuisut Siulittaasuat